

**BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
OPĆINA VOGOŠĆA  
OPĆINSKI NAČELNIK**

Broj: 02-19-1131/26  
Vogošća, 12.05.2026. godine

**OPĆINSKO VIJEĆE  
V O G O Š Ć A**

**PREDLAGAČ:** Općinski načelnik

**OBRAĐIVAČ:** Služba za investicije i komunalne poslove

**SADRŽAJ:** Izveštaj o zimskom održavanju puteva na području općine Vogošća sa  
finansijskim pokazateljima u sezoni 2025/2026. godina

Dostavljamo Vam Izveštaj o zimskom održavanju puteva na području općine Vogošća sa  
finansijskim pokazateljima u sezoni 2025/2026. godina, na razmatranje i usvajanje.

**PREDLAGAČ  
OPĆINSKI NAČELNIK**

---

Migdad Hasanović

Na osnovu člana 70. stav 1. tačka 16. Statuta Općine Vogošća („Službene novine Kantona Sarajevo“, broj: 27/14 – Prečišćeni tekst, 14/15, 9/20 i 23/24) i člana 103. Poslovnika Općinskog vijeća Vogošća („Službene novine Kantona Sarajevo“, broj: 27/14 – Prečišćeni tekst, 18/15, 45/15, 10/16, 51/18 i 28/20), Općinsko vijeće Vogošća na sjednici održanoj \_\_\_\_\_ 2026. godine, donijelo je

## **ZAKLJUČAK**

Usvaja se Izvještaj o zimskom održavanju puteva na području općine Vogošća sa finansijskim pokazateljima u sezoni 2025/2026. godine.

Broj:  
Vogošća,

**PREDSJEDAVAJUĆI  
OPĆINSKOG VIJEĆA VOGOŠĆA**

---

**Nihad Hadžić**

BOSNA I HERCEGOVINA  
FEDERACIJA BOSNE I HERCEGOVINE  
KANTON SARAJEVO  
OPĆINA VOGOŠĆA  
OPĆINSKI NAČELNIK  
**Služba za investicije i komunalne poslove**

Broj: 07-19-1131/26  
Vogošća, 12.05.2026. godine

## **IZVJEŠTAJ O ZIMSKOM ODRŽAVANJU PUTEVA NA PODRUČJU OPĆINE VOGOŠĆA SA FINANSIJSKIM POKAZATELJIMA U SEZONI 2025/2026. GODINA**

### **I UVOD**

Zakonom o cestama Federacije Bosne i Hercegovine („Službene novine Federacije BiH“, broj: 12/10, 16/10 i 66/13) i Zakonom o cestama Kantona Sarajevo („Službene novine Kantona Sarajevo“, broj: 1/22) određeno je u članu 13. stav 4., odnosno u članu 13. stav 2. da upravljanje, građenje, rekonstrukciju, održavanje i zaštitu lokalnih puteva, gradskih ulica i javnih staza vrše nadležni općinski ili gradski organi, na kojima se prilikom izvođenja radova osigurava nesmetan i siguran saobraćaj i očuvanje stanja puta.

Osnovni ciljevi održavanja javnih cesta su:

- sprječavanje propadanja cesta;
- omogućavanje sigurnog saobraćaja;
- smanjenje troškova korisnika dobrim stanjem cesta;
- dovođenje ceste u projektovano stanje uzimajući u obzir izmijenjene potrebe saobraćaja;
- zaštita ceste od korisnika i trećih osoba, zaštita okoliša od štetnog utjecaja ceste i cestovnog saobraćaja.

Standardima redovnog održavanja javnih cesta u skladu sa Smjernicama za projektovanje, građenje, održavanje i nadzor na cestama Federacije BiH osigurava se neometan i siguran saobraćaj na cestama.

Održavanje javnih cesta obavlja se na osnovu godišnjeg plana održavanja, odnosno prioritet kod održavanja cesta određuje se godišnjim planom za svaku cestu ili dionicu ovisno o:

- vrsti ceste;
- namjeni ceste;
- saobraćajnoj funkciji i
- intezitetu i vrsti saobraćaja.

Vrste održavanja javnih cesta su:

- redovno održavanje;
- vanredno održavanje.

Redovno održavanje čini skup mjera i radnji koje se obavljaju tokom većeg dijela ili cijele godine na cestama uključujući i sve objekte i instalacije sa svrhom održavanja prohodnosti i tehničke ispravnosti cesta i sigurnosti saobraćaja na njima.

Vanredno održavanje javnih cesta obuhvata obimnije radove koji se izvode u cestovnom pojasu, poboljšanje elemenata ceste, stabilnosti i trajnosti ceste i cestovnih objekata i povećanje sigurnosti saobraćaja i izvode se na osnovu tehničke dokumentacije.

Upravitelji cesta direktno ne izvode radove održavanja javnih cesta. Izvođenje radova održavanja cesta upravitelji javnih cesta ustupaju po postupku i na način utvrđen važećim Zakonom o cestama FBiH, Zakonom o cestama Kantona Sarajevo i odredbama Zakona o javnim nabavkama BiH.

Za provedbu godišnjeg plana održavanja javnih cesta izrađuje se operativni program radova održavanja javnih cesta. Operativni program izrađuje se posebno za održavanje cesta u zimskom periodu na osnovu plana rada zimske službe. Operativnim programom radova određuju se potrebna finansijska sredstva, materijali, količina i vrsta radova i rokovi izvršenja za svaku cestu ili dionicu ceste.

Pod održavanjem cesta u zimskim uvjetima podrazumijevaju se radovi neophodni za održavanje prohodnosti cesta i sigurnog odvijanja saobraćaja. Da je prohodnost ceste osigurana podrazumijeva se ako visina snijega na kolovozu ne prelazi 10 cm, ili 15 cm u zavisnosti od kategorije ceste i ukoliko je saobraćaj moguć vozilima koja su opremljena zimskom opremom. Zimska služba nije dužna osigurati prohodnost na cesti kada se proglaši nastupanje elementarne nepogode (ako je izrazito visok snijeg praćen olujnim vjetrom, kod pojave velikih sniježnih nanosa, te pojave ledene kiše na većem području).

Upravitelji cesta planiraju, organiziraju i provode zimsku službu putem izvođača osposobljenih i opremljenih za zimsko održavanje cesta.

U skladu sa članom 44. Zakona o cestama Federacije BiH („Službene novine Federacije BiH“, broj: 12/10, 16/10 i 66/13), članom 41. Zakona o cestama Kantona Sarajevo („Službene novine Kantona Sarajevo“, broj: 1/22) i članovima 7. i 8. Odluke o razvrstavanju vangradskih lokalnih cesta na području Kantona Sarajevo („Službene novine Kantona Sarajevo“, broj: 22/13 i 40/14) Direkcija za puteve Kantona Sarajevo i Općina Vogošća su provodile rad zimske službe na osnovu operativnih programa, a u zavisnosti od značaja po prioritetima određenim Planom.

U skladu sa Zakonom o javnim nabavkama BiH, za lokalne i nekategorisane puteve i trotoare koji su u nadležnosti Općine Vogošća, provodi se tenderska procedura za izbor najpovoljnijeg ponuđača zimskog održavanja puteva i trotoara, odnosno isti mora biti registrovan, specijalizovan i opremljen za te radove, te da raspolaže osposobljenim kadrovima za izvođenje predmetnih radova. Dio lokalnih puteva je predat Direkciji za puteve Kantona Sarajevo na održavanje i zaštitu prema zaključenom Ugovoru o regulisanju međusobnih odnosa na poslovima održavanja i zaštite dijela lokalnih cesta na području općine Vogošća.

U saradnji sa Službom civilne zaštite Općine Vogošća se održavaju stepeništa i pothodnici koji su u nadležnosti Općine Vogošća.

Izveštaj o radu „Zimske službe“ u sezoni 2025/2026. godine baziran je na realizaciji Plana zimskog održavanja puteva na području općine Vogošća u sezoni 2025/2026. godina, usvojenog Odlukom Općinskog vijeća Vogošća na sjednici održanoj 29.05.2025. godine (u daljem tekstu: Plan).

Usvojenim Planom obuhvaćeni su svi putevi koji su od interesa za Kanton Sarajevo i putevi koji su od interesa za Općinu Vogošća, kao i nekategorisani putevi i trotoari na području cijele Općine.

Nakon usvajanja Plana, Služba za investicije i komunalne poslove Općine Vogošća je provodila aktivnosti na provjeri tržišta u svrhu raspisivanja javne nabavke i informiranja privrednih subjekata o svojim planovima i zahtjevima u vezi sa nabavkom, što je u skladu sa odredbama Člana 14a Zakona o javnim nabavkama BiH ("Službeni glasnik BiH", br. 39/14, 59/22 i 50/24). Shodno tome, Služba se putem zvaničnih e mail poruka obratila privrednim subjektima koji su registrovani za obavljanje predmetne djelatnosti i zatražene su informativne ponude od 14 (četnaest) firmi. U okviru navedene provjere tržišta, Služba nije zaprimila ni jedan odgovor na zahtjev za informativnu ponudu. Budući da nije zaprimljena ni jedna informativna ponuda, pristupilo se procjeni cijene koštanja za izvođenje radova zimskog održavanja lokalnih i nekategorisanih puteva i trotoara na području općine Vogošća za sezonu 2025/2026. godina na način da su uzete cijene koštanja radova iz prethodne sezone i iste su uvrštene u definisane specifikacije koje su usvojene Planom.

Na osnovu formirane procjene koštanja zimskog održavanja lokalnih i nekategorisanih puteva i trotoara Služba za investicije i komunalne poslove je, u skladu sa odredbama Zakona o javnim nabavkama BiH, pokrenula postupak javnog poziva za izbor najpovoljnijeg ponuđača radova za zimsko održavanje lokalnih i nekategorisanih puteva i trotoara na području općine Vogošća u sezoni 2025/2026. godina. Nakon izvršenog otvaranja ponuda Komisija za javne nabavke Općine Vogošća je konstatovala da je zaprimljena jedna ponuda i ista je ispunjavala formalno-pravne uslove. Zatim je Komisija za javne nabavke pristupila razmatranju finansijskog dijela ponude ponuđača, te je izvršena računaska provjera dostavljene ponude i utvrđeno je da nema računskih grešaka, a sve u skladu sa odredbama člana 17. Stav 1. Uputstva za pripremu modela tenderske dokumentacije i ponuda ("Službeni glasnik BiH", broj: 90/14 i 20/15). Shodno tome, Ugovorni organ je donio Odluku o izboru najpovoljnijeg ponuđača i sa firmom "Ame" d.o.o. Breza je zaključen Ugovor na "Izvođenju radova na zimskom održavanju lokalnih i nekategorisanih puteva i trotoara na području općine Vogošća u sezoni 2025/2026. godina".

Po zaključenju ugovora i imenovanju nadzornog organa izrađeni su operativni programi rada zimske službe, u čiju izradu su bili uključeni svi nadležni organi (Direkcija za puteve Kantona Sarajevo, izvođač radova, investitor, predstavnici mjesnih zajednica Općine Vogošća, nadzorni organi).

Nadzor na izvršenju Plana rada zimske službe za puteve od interesa za Kanton Sarajevo vršio je Institut za građevinarstvo "IG" d.o.o. Banja Luka, a za puteve od interesa za Općinu Vogošća Zavod za izgradnju Kantona Sarajevo u koordinaciji sa sekretarima mjesnih zajednica i predstavnicima Službe za investicije i komunalne poslove Općine Vogošća.

Operativni program provođenja zimske službe obuhvatio je period od 15. novembra 2025. godine do 15. marta 2025. godine, gdje se osigurava stalno dežurstvo na punktu zimske službe (zimski sezona traje od 15. novembra do 15. marta, uz mogućnost da radovi mogu početi i ranije, odnosno završiti kasnije).

## **II PRIORITETI ZIMSKOG ODRŽAVANJA**

U Planu zimskog čišćenja puteva predviđeni su prioriteti za odražavanje puteva i trotoara, odnosno u skladu s istim se djelovalo na terenu i to:

### I prioritet

Na cestama koje su operativnim programom zimske službe svrstane u prvi prioritet, radovi na osiguranju prohodnosti se moraju izvoditi permanentno u cilju osiguranja stalne prohodnosti i dovršiti u roku od 5 sati u nizijskom odnosno 8 sati u planinskom području, računajući od trenutka prestanka padavina.

### II prioritet

Na cestama drugog prioriteta u vrijeme sniježnih padavina i pojave ledene kiše ne smije doći do zastoja u odvijanju saobraćaja duže do 5 sati u toku dana, odnosno obezbjediti potpunu prohodnost u roku od 12 do 24 sata računajući od trenutka prestanka padavina.

### III prioritet

Operativnim programom zimske službe mogu se pojedine ceste ili dijelovi cesta predvidjeti u treći prioritet. Na cestama ovog prioriteta obaveza je stvaranja uslova za sigurno odvijanje saobraćaja, uz kraće zastoje do 9 sati najduže i isti se moraju dovršiti u roku od 24 do 72 sata, računajući od trenutka prestanka padavina.

Općina Vogošća, kao upravitelj cesta utvrdila je pravila i tehničke uslove za odvijanje rada zimske službe i izradu operativnog programa rada zimske službe.

## **III METODOLOGIJA OBRAČUNA RADOVA ZIMSKOG ODRŽAVANJA**

Osnov za obračun radova zimske službe je uvođenje stepena pripravnosti u ovisnosti od očekivanih vremenskih uslova i geografsko-klimatskih karakteristika područja, kao i izvještaj o zabilježenim vremenskim prilikama od Federalnog hidrometeorološkog zavoda i Direkcije za puteve Kantona Sarajevo.

### Prvi stepen pripravnosti,

uvodi se sa početkom rada zimske službe, a prema operativnom programu od 15. novembra do 15. marta uvodi se stalno dežurstvo u mjestima pripravnosti, uspostavlja se stalna veza u skladu sa programom rada, te osigurava dovoljan broj ljudstva i mehanizacije radi intervencije u slučaju potrebe (putarska služba i kamioni sa plugom i posipačem, posebno na važnijim putevima i putevima u brdskim i planinskim predjelima).

U prvom stepenu pripravnosti vrši se preventivno posipanje cesta u slučajevima kada je za očekivati da će se temperature spustiti ispod nule i da će zbog toga doći do poledice na vlažnim mjestima (mostovi, osojna mjesta).

U prvom stepenu pripravnosti izvođaču radova se obračunava 30 % od vrijednosti zimskog održavanja jednog dana i onda množi sa brojem dana u mjesecu sa prvim stepenom pripravnosti.

#### Drugi stepen pripravnosti,

podrazumijeva uključivanje u rad svih planiranih vozila sa opremom za čišćenje snijega i sprečavanje poledice, pomoćni radnici, kao i sredstva za utovar posipnog materijala, a uvodi se kad to vremenski uslovi zahtjevaju (slabije snježne padavine i pojava poledice).

U drugom stepenu pripravnosti, izvođaču radova se obračunava 100 % od vrijednosti zimskog održavanja jednog dana i onda se množi sa brojem dana u mjesecu sa drugim stepenom pripravnosti.

#### Treći stepen pripravnosti,

zimske službe uvodi se kad se očekuje dugotrajnije padanje snijega koje zahtjeva posebne radove uklanjanja snijega sa puta, kada se pored vozila sa plugom i posipačem uključuju i jači utovarivači, grejderi i freze za odgrtanje i bacanje snijega sa puta.

U trećem stepenu pripravnosti, izvođaču radova se obračunava 125 % od vrijednosti zimskog održavanja jednog dana i onda se množi sa brojem dana u mjesecu sa trećim stepenom pripravnosti.

#### Četvrti stepen pripravnosti,

uvodi se kad snježne padavine, uz jak vjetar, imaju karakter elementarne nepogode i kad planirani broj ljudi i mehanizacije, nisu dovoljni za uklanjanje snijega i kada se uvode i dodatna sredstva rada i radna snaga. Eventualni radovi u četvrtom stepenu pripravnosti se posebno obračunavaju.

### **IV REALIZACIJA PLANA RADA ZIMSKE SLUŽBE**

Planom zimskog održavanja puteva na području općine Vogošća, usvojen je obim zimskog održavanja puteva u sezoni 2025/2026. godina i to na cijelom području općine Vogošća, uključujući i puteve od značaja za Kanton Sarajevo.

Na osnovu Ugovora o regulisanju odnosa na poslovima redovnog zimskog održavanja dijela lokalnih puteva na području općine Vogošća, potpisanog između Općine Vogošća i Direkcije za puteve Kantona Sarajevo, Direkcija je vršila održavanje puteva u dužini od 22,56 km.

Općina Vogošća, u skladu sa usvojenim tabelarnim prikazom u prilogu Plana, vršila je održavanje puteva u dužini od 126,501 km (povećanje u odnosu na prethodnu sezonu za 3,241 KM), trotoara u dužini od 31,365 km (povećanje u odnosu na prethodnu sezonu za 1,13 km), stepeništa i pothodnika u dužini od 0,72 km, kao i održavanje puteva po potrebi i nalogu u dužini od 11,05 km, uz isporuku dodatnih količina posipne soli mjesnim zajednicama (planirano ukupno 20,00 tona), kao i planiranih dodatnih radova po potrebi (sječenje granja i šiblja uz cestu - 5.000,00 m<sup>2</sup>, ručno čišćenje kolovoza od rasutog materijala, manjih osulina i odrona zemlje - 5.000,00 m<sup>2</sup>, intervencije na zemljanim i/ili betonom uređenim kanalima i sličnim objektima – 200,00 m<sup>3</sup>).

Zimsko održavanje puteva od interesa za Kanton Sarajevo i puteva u nadležnosti Općine Vogošća vršila je firma „AME“ d.o.o. Breza, a ista je izabrana putem javnog poziva od strane Direkcije za puteve Kantona Sarajevo i Općine Vogošća.

Osnov za rad „Zimske službe“ bio je Plan rada zimske službe i operativni program, sa tabelarnim prikazom svih puteva, koji je pored naziva ulice sadržavao i podatke u smislu količina, dužine, širine i određenih prioriteta na cijelom području općine Vogošća.

Osnovne aktivnosti zimskog održavanja lokalnih i nekategorisanih puteva ogledale su se u uklanjanju snijega sa ceste sa pratećim aktivnostima neophodnim za odvijanje bezbjednog pješaćkog i motornog saobraćaja, te održavanju saobraćajne signalizacije.

Zimska sezona 2025/2026. godine trajala je ukupno 122 dana, jer je ista produžena za 2 (dva) dana na osnovu prognoze Federalnog hidrometeorološkog zavoda i na osnovu preporuke Direkcije za puteve Kantona Sarajevo, tj. na osnovu pogoršavanja vremenskih uslova krajem mjeseca marta 2026. godine.

Izvršena je isporuka 19 tona posipne soli na području svih mjesnih zajednica i podjela iste u područja u kojima je održavanje otežano ili ga nikako nema (u odnosu na prethodnu sezonu više za 4 tone).

Planom zimskog održavanja puteva na području općine Vogošća planirani su i lokalni putevi koji su u nadležnosti Općine Vogošća, a koji se održavaju po potrebi i nalogu Investitora. Realizovano je ukupno 10 pojedinačnih intervencija u sezoni (manje za 66 intervencija u odnosu na prethodnu sezonu). Dodatnih radova u vidu sječe granja i šiblja, uklanjanja rasutog materijala i intervencija na kanalima nije bilo.

### **Realizacija Ugovora – finansijski pokazatelji**

Ugovor o izvođenju radova na zimskom održavanju lokalnih i nekategorisanih puteva i trotoara na području općine Vogošća, u sezoni 2025/2026. godina, zaključen je sa firmom „Ame“ d.o.o. Breza u ukupnom iznosu od **519.558,02 KM bez PDV-a**, odnosno **607.882,88 KM sa PDV-om**.

Za zimsko održavanje puteva (uklanjanje snijega sa kolovoza, posipanje posipnog materijala zbog sprječavanja poledice, uklanjanje snijega sa trotoara, kao i pojedinačne intervencije, uključujući i podjelu dodatne posipne soli stanovništvu) u sezoni 2025/2026. godina utrošeno je **261.500,33 KM sa PDV - om**, odnosno **43,02 %** od ukupnog iznosa ugovorenih radova.

## **V OPIS PROVOĐENJA PLANA ZIMSKOG ODRŽAVANJA CESTA**

Operativni Plan i program zimskog održavanja puteva u zimskoj sezoni 2025/2026. godine je provođen od strane izvođača radova kojem je povjeren posao za održavanje puteva na području općine Vogošća.

Zimska sezona je započeta 15. novembra 2025. godine uvođenjem Izvođača radova u posao od strane Nadzornog organa. Na punktu zimske službe je uvedeno stalno dežurstvo, čime su započeti radovi na realizaciji ugovorenih radova.

U mjesecu novembru 2025. godine registrovane su sniježne padavine i registrovan je određeni broj dana sa temperaturama ispod 0 °C i Izvođač je radova je djelovao na terenu uz manje poteškoće. Uglavnom na terenu se djelovalo u skladu sa Operativnim Planom i programom, zaprimljen je određeni broj primjedbi od strane građana općine Vogošća i iste su provjeravane na terenu. Opravdane primjedbe, uz intervenciju nadzornog organa, predstavnika Službe za investicije i komunalne poslove i mjesnih zajednica prema Izvođaču radova, su otklanjane u zadovoljavajućem obimu. U ovom mjesecu registrovano je ukupno 11 (jedanaest) dana I stepena pripravnosti, 4 (četiri) dana II stepena pripravnosti, 1 (jedan) dan III stepena pripravnosti, isporučeno je ukupno 9 (devet) tona dodatne posipne soli mjesnim zajednicama i izvršena je 1 (jedna) intervencija po potrebi i nalogu Investitora.

Mjesec decembar 2025. godine protekao je uglavnom bez značajnijih padavina i sa relativno većim temperaturama u odnosu na uobičajne i bez većih problema na terenu. U skladu s tim registrovano je ukupno 31 (tridesetjedan) dan I stepena pripravnosti zimske službe i isporučena je 1 (jedna) tona dodatne posipne soli, bez intervencija po potrebi i nalogu Investitora.

Početak mjeseca januara 2026. godine nastupile su veće sniježne padavine sa izraženim temperaturama ispod 0 °C i sa dodatnom pojavom ledene kiše. Registrovani su brojni problemi na terenu u većem dijelu Općine Vogošća. U prvim danima sniježnih padavina, tokom ovog mjeseca, zaprimljen je značajan broj primjedbi građana. Predstavnici Službe za investicije i komunalne poslove su u saradnji sa sekretarima i Savjetima mjesnih zajednica vršili 24-satno dežurstvo, terenske provjere i bili u stalnoj komunikaciji sa Nadzornim organom i Izvođačem radova. Zaprimljene primjedbe, koje su u većini slučajeva bile opravdane, uredno su i na vrijeme prosljeđivane na postupanje Nadzornom organu i Izvođaču radova. Možemo konstatovati da Izvođač radova nije adekvatno pristupio realizaciji Operativnog Plana i programa u određenim ulicama. Treba napomenuti da su poteškoće isto tako registrovane i na gotovo svim lokalnim saobraćajnicama koje su predate na održavanje i zaštitu Direkciji za puteve Kantona Sarajevo, te su zaprimljene primjedbe prosljeđivane istim na postupanje.

Predstavnici Službe za investicije i komunalne poslove Općine Vogošća su primjedbe na realizaciju Operativnog Plana i programa dokumentovali na terenu i ista dokumentacija je dostavljena na postupanje nadzornom organu i nadležnim inspekcijskim tijelima.

Održano je nekoliko sastanaka sa Nadzornim organom i predstavnicima inspekcijskih organa, kao i sa predstavnicima Izvođača radova koji su iznosili svoja objašnjenja, opravdanja i poteškoće na terenu. Predstavnici Službe za investicije i komunalne poslove Općine Vogošća su insistirali na punoj primjeni Operativnog Plana i programa i jasno izrazili nezadovoljstvo u vezi sa objašnjenjima i opravdanjima Izvođača radova, kao i mišljenjima sudionika u vezi korekcije vrijednosti izvedenih radova u odnosu na obim i kvalitet ugovorenih i izvedenih radova. Radi lakšeg razumijevanja sudionika u izvođenju javnih radova, informišemo da je Nadzorni organ u okviru svojih dužnosti (zakonskom legislativom i ugovorom utvrđene dužnosti), ovlašten: da odobrava Operativni Plan i program; vrši fizičku kontrolu i evidenciju vozila koja su tražena tenderskom dokumentacijom; da vrši provjeru na terenu i utvrdi kvalitet radova i posipnog materijala u skladu sa propisanim zakonima, važećim tehničkim propisima i standardima koji regulišu predmetne radove; potvrđuje urednost izvođenja radova; vrši pregled i ovjeru obračunskih situacija uz eventualne korekcije (prema usvojenoj metodologiji iz Plana); da po završetku i okončanju radova provjerava na terenu da li je uklonjen sav višak posipnog materijala i opreme sa saobraćajnica, te priprema i dostavlja izvještaj naručiocu o obavljenom nadzoru nad izvođenjem radova.

Zbog poteškoća na terenu, angažirana je dodatno Služba civilne zaštite Općine Vogošća i Vatrogasno društvo Vogošća koji su djelovali u kritičnim područjima, te su se u pomoć uključili i određeni volonteri, kao npr. članovi ATV kluba Motka, određeni broj građana Općine Vogošća i drugi.

Zbog neizvršavanja u potpunosti ugovorenih radova na terenu od strane Izvođača radova izvršene su inspekcijske kontrole sa nivoa Općine Vogošća i Kantona Sarajevo.

Kantonalna uprava za inspekcijske poslove Kantona Sarajevo zaprimila je više prijava u vezi neuklanjanja snijega sa javnih površina od strane firme „Ame“ d.o.o. Breza, kao izvođača radova na području općine Vogošća. U dostavljenoj informaciji od Kantonalne uprave za inspekcijske poslove Kantona Sarajevo informisani smo da su Zakonom o komunalnoj čistoći („Sl. novine Kantona Sarajevo“, br. 14/16, 43/16, 19/17, 20/18 i 22/19) propisane nadležnosti uklanjanja

snijega i to članom 41. Zakona je propisano da uklanjanje snijega sa javnih površina vrše komunalna preduzeća. S obzirom da uklanjanje snijega sa javnih površina u Općini Vogošća ne vrše komunalna preduzeća, a da Zakonom o komunalnoj čistoći nije precizirano vršenje uklanjanja snijega sa javnih površina od strane drugih pravnih lica, te nisu definisane ni novčane kazne za isto, informisani smo da komunalni inspektori navedenog Inspektorata nemaju zakonom utemeljenu mogućnost vršenja inspeksijskog nadzora i izricanja sankcija u slučajevima kada pravna lica, angažovana od Općine, ne vrše planirano uklanjanje snijega sa javnih površina. Inspektorat Općine Vogošća, tj. općinski inspektor je, u okviru kontrole na terenu i kroz sačinjeni Zapisnik, konstatovao da se lokalne i nekategorisane ceste, kao i ostale ceste na području općine Vogošća ne održavaju u skladu sa Zakonom o cestama Kantona Sarajevo („Službene novine Kantona Sarajevo“, br. 1/22) i da je Izvođač radova odgovoran za neizvršavanje ugovorenih obaveza. Inspektorat Općine Vogošća je donio Rješenje kojim se naređuje da Izvođač radova u određenom vremenu izvede sve potrebne radove na uklanjanju snijega i leda sa kolovoza i pješačkih staza i posipanje kolovoza i pješačkih staza radi sprečavanja poledice u svrhu osiguranja nesmetanog i sigurnog saobraćaja na teritoriji Općine Vogošća, te da za te potrebe angažuje svu raspoloživu opremu, ljudstvo, te potreban materijal prema Operativnom Planu i ugovorenim obavezama.

Budući da Izvođač radova nije postupio po predmetnom Rješenju pokrenut je Zahtjev za pokretanje prekršajnog postupka i donesen je Zaključak o dozvoli izvršenja.

Treba napomenuti da su i policijski službenici Policijske uprave Vogošća zaprimili veći broj poziva upućenih od strane građana Općine Vogošća u vezi problema sa neadekvatnim održavanjem puteva. U skladu sa raspoloživim kapacitetima, policijski službenici su poduzimali mjere i radnje iz njihove nadležnosti na održavanju i dovođenju stanja sigurnosti saobraćaja na veći nivo, kao i poduzimanje mjera i radnji prema preduzeću/pravnom licu zaduženom za zimsko održavanje puteva u skladu sa važećim Zakonom o osnovama sigurnosti saobraćaja u BiH.

U mjesecu januaru 2026. godine registrovano je ukupno 17 (sedamnaest) dana I stepena pripravnosti, 11 (jedanaest) dana II stepena pripravnosti, 3 (tri) dana III trećeg stepena pripravnosti, isporučeno je 9 (devet) tona dodatne posipne soli mjesnim zajednicama i izvršeno je 7 (sedam) intervencija po potrebi i nalogu Investitora.

Mjesec februar 2026. godine je protekao bez većih sniježnih padavina i bez značajnijih problema na terenu. Izvođač radova se uglavnom pridržavao Operativnog Plana i programa i u skladu s istim djelovalo se na terenu. Ukupno je registrovano 26 (dvadesetšest) dana I stepena pripravnosti, 2 (dva) dana II stepena pripravnosti. Nije bilo dodatne isporuke soli, a ni pojedinačnih intervencija po potrebi i nalogu investitora.

U mjesecu martu 2026. godine, u okviru zimske sezone koja je trajala do 15-og (stalno dežurstvo na punktu zimske službe) nisu registrovane veće padavine niti značajnije intervencije na terenu. Međutim, krajem mjeseca marta registrovane su značajne sniježne padavine i zimsko održavanje je produženo za dodatna 2 (dva) dana, tako da je Izvođač djelovao na terenu i vršio održavanje puteva i trotoara koji su definisani Planom. U mjesecu martu registrovano je 14 (četnaest) dana I stepena pripravnosti, 2 (dva) dana II stepena pripravnosti i 2 (dvije) intervencije po potrebi i nalogu Investitora. Realizacijom navedenih radova završeni su radovi na zimskom održavanju lokalnih i nekategorisanih puteva i trotoara u sezoni 2025/2026. godina. Nakon završene zimske sezone, odnosno po okončanju predmetnih radova, Izvođač je dužan izvršiti uklanjanje zaostalog abrazivnog (posipnog) materijala sa saobraćajnica, čime bi se spriječilo začepljenje slivnika i slivničkih rešetki, kao i drugi problemi koje zaostali materijal može izazvati. Zatraženo je više puta od Izvođača radova uklanjanje predmetnog materijala, te je o tome informisan Nadzorni organ da

poduzme aktivnosti iz svoje nadležnosti. Obaveza Nadzornog organa je da izvrši provjeru da li je izvršeno uklanjanje abrazivnog (posipnog) materijala sa saobraćajnica, odnosno poduzimanje daljih aktivnosti ukoliko se navedeni poslovi ne izvrše na adekvatan način.

Stepeni pripravnosti evidentirani u sezoni 2025/2026. godina

Na osnovu stepena pripravnosti vršio se obračun izvršenih radova, što je i pokazatelj kakvi su bili uslovi za zimsko održavanje i koliko je realizovano finansijskih sredstava. Zabilježeno je ukupno:

- 99 dana 1. stepena pripravnosti,
- 19 dana 2. stepena pripravnosti,
- 4 dana 3. stepena pripravnosti,
- 0 dana 4. stepena pripravnosti.

**Akt pripremio:** Adin Bajraktarević

---

**Akt kontrolisao:** Sanjin Korman

---

**Akt odobrio:** Fetah Kadrić

---

**POMOĆNIK  
OPĆINSKOG NAČELNIKA**

---

**Fetah Kadrić**

Na osnovu člana 70. stav 1. tačka 16. Statuta Općine Vogošća („Službene novine Kantona Sarajevo“, broj: 27/14 – Prečišćeni tekst, 14/15, 9/20 i 23/24) i člana 103. Poslovnika Općinskog vijeća Vogošća („Službene novine Kantona Sarajevo“, broj: 27/14 – Prečišćeni tekst, 18/15, 45/15, 10/16, 51/18 i 28/20), Općinsko vijeće Vogošća na sjednici održanoj \_\_\_\_\_ 2026. godine, donijelo je

## **ZAKLJUČAK**

Usvaja se Izvještaj o zimskom održavanju puteva na području općine Vogošća sa finansijskim pokazateljima u sezoni 2025/2026. godine.

Broj:  
Vogošća,

**PREDSJEDAVAJUĆI  
OPĆINSKOG VIJEĆA VOGOŠĆA**

---

**Nihad Hadžić**